




### БАСПАНА НАРЫҒЫ: БАҒА ЖӘНЕ БОЛЖАМ

5-БЕТ | МӘСЕЛЕ



### АЙБАРЛЫ ДА АЙБАТТЫ СҰЛТАН

6-БЕТ | РУХАНИЯТ



### РУХЫ МЫҚТЫ АТЛЕТ

7-БЕТ | СПОРТ



Қасым-Жомарт ТОҚАЕВ,  
ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

Мен былтырғы құрылтайда ұрпақты еңбекке баулуға қатысты бірқатар тапсырма бердім. Соның негізінде мектептерге еңбек сабағы қайтарылды. Осы бағыттағы жұмысты одан әрі жалғастыруымыз керек. Сондай-ақ біз ел болып қарапайым еңбек адамын қадірлей білуіміз қажет. Қажетсіз мамандық болмайды, біліксіз маман болады. Ерінбей еңбек еткен жан өз ісінің майталманы атанады. Ал кәсібін толық меңгерген адам қашанда сұранысқа ие болады.

№98  
(4531)  
Сенбі  
19 тамыз  
2023 жыл



# ASTANA



РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

A Q S H A M Y

1990 ЖЫЛҒЫ 13 ҚАЗАННАН БАСТАП ШЫҒАДЫ



Сұлтан СЕЙІТ

## ЕЛОРДАНЫҢ КЕЛБЕТІ ҚАЛАЙ ӨЗГЕРЕДІ?

Мемлекет басшысы Қасым-Жомарт Тоқаев қаңтар айында елорданы дамыту мәселелері бойынша кеңес өткізіп, бас шаһардың даму стратегиясын қайта қарап, жаңадан бас жоспар дайындауды тапсырғаны мәлім. Президент елордамыз дамудың жаңа үлгісіне көшуге, Астана инновациялық шаһар болуға тиіс екенін атап өтті. Әлемде қаланы басқарудың жаңа цифрлы тәсілдері қарқынды түрде еніп жатқанын, біз де оған баса назар аударуымыз керекін қадап айтты. Президент қалалық әкімдікке Цифрлық даму министрлігімен бірлесіп, бұл жұмысты дереу қолға алуды тапсырды. Бас жоспардың жобасына қатысты өткізілген қоғамдық тыңдауда осы және бұдан басқа да өзекті мәселелер ашық талқыланды.



### ЖАСТАРҒА – ТЕГІН КЕҢЕС

Қазіргі таңда жастарға қызмет көрсету орталықтары елорданың 4 ауданында бар.

Мамандар мемлекеттік тұрғын үй бағдарламалары, жұмысқа орналастыру, жастардың бастамаларын қолдау, волонтерлік қызмет, сондай-ақ бос уақытты тиімді әрі тегін өткізу мәселелері бойынша кеңес береді. Тегін заңгерлік және психологиялық көмек көрсетеді. Былтыр орталықтарға 10 мыңға жуық жас адам жүгінген. Жастардың көпшілігін баспана алу мен жұмысқа орналасу мәселесі алаңдатады. Сонымен қатар, орталық психологтары жеке және топтық түрде психологиялық кеңес береді.



1 қыркүйектен бастап студент, магистрант, докторанттардың шәкіртақысы өседі. Премьер-министр Әлихан Смайылов Үкіметтің тиісті қаулысына қол қойды.

Мемлекет басшысы Қасым-Жомарт Тоқаевтың тапсырмасымен Қазақстанда 1 қыркүйектен бастап ай сайынғы мемлекеттік шәкіртақы мөлшері өседі. Бұл туралы ҚР Үкіметінің ресми Telegram арнасында жазылды.

Бакалавриат студенттерінің шәкіртақысы 20 пайызға, магистранттар мен докторанттар шәкіртақысы 15 пайызға, ТЖБ студенттерінің шәкіртақысы 50 пайызға өседі.

Қаулы 2023 жылғы 1 қыркүйектен бастап қолданысқа енеді.



Аманат партиясы жаңа оқу жылы қарсаңында «Баланы мектепке дайындайық!» жалпыреспубликалық қайырымдылық шарасын бастады.

Игі дәстүрге айналған іс-шара «Бақытты отбасы» партиялық жобасы аясында осымен 13-мәрте өткізіліп отыр. Оның басты мақсаты – көпбалалы және аз қамтылған отбасылардағы балаларды жаңа оқу жылына дайындауға көмектесу.

ВАЛЮТА  
БАҒАМДАРЫ

€ EUR/KZT 503.38 \$ USD/KZT 463.19 ₸ RUB/KZT 4.99 ¥ CNY/KZT 63.39

@NurSultanNewsBot | t.me/elordainfo

www.astana-akshamy.kz



## ДАМУДЫҢ БАҒЫТТАРЫН АЙҚЫНДАДЫ

Президент Қасым-Жомарт Тоқаев Алматы қаласына жұмыс сапарымен барып, қаладағы гидротехникалық инфрақұрылыммен танысып, бірқатар әлеуметтік нысанды аралап көрді. Сондай-ақ, Алматы қаласының әлеуметтік-экономикалық даму мәселелері жөнінде кеңес өткізді.

### 30 ЖЫЛДА АЛҒАШ САЛЫНҒАН БӨГЕТ

Президент Қасым-Жомарт Тоқаевтың Алматы қаласына жұмыс сапары биыл 1 маусымда пайдалануға берілген сел тасқынынан қорғайтын бөгетпен танысудан басталды. «Аюсай» бөгеті Үлкен Алматы өзенінің бассейнінде орналасқан. Оның жоғары жағында сел қаупі бар 98 учаске, 89 мұздық, 20 мореналық және мұзды көл бар. Бөгет сел жүру қаупін барынша азайтып, 500 мыңнан астам халық пен 2 мыңға жуық нысанның табиғат апатынан қорғалуын қамтамасыз етеді. Еліміздің биік таулы аймақтарында 970 мореналық көл бар. Оның ішінде 156 көлде сел жүру қаупі жоғары.

Маңызды екенін атап өтті. Бұл ретте Президент Төтенше жағдайлар министрлігі, Алматы қаласы әкімі және «Қазселденқорғау» мекемесі өзара тығыз қарым-қатынаста жұмыс істеуі қажет екенін айтты. «Аюсай» бөгетінде Қасым-Жомарт Тоқаевқа қанатқақты жоба аясында орнатылған 31 цифрлық гидробекет таныстырылды. Бұл қондырғылар судың жылдамдығына, температурасына, лайлылығына және басқа да көрсеткіштерге онлайн-режимде мониторинг жүргізеді. Мұндай технологиялар келешекте еліміздің жеті таулы аймағында қолданысқа енгізіледі. Гидробекеттердегі және ТЖМ Дағдарыс жағдайын басқару орталығының бірыңғай ақпараттық жүйесімен интеграцияланатын барлық ғылыми ұйым мен салалық ведомстволарға қолжетімді болады.

### PROMETHEUS SCHOOL МЕКТЕБІНЕ БАРДЫ

Қасым-Жомарт Тоқаев Алматы қаласына жасаған жұмыс сапары аясында Prometheus school білім беру ұйымын аралап көрді. Президентке білім ордасының оқу кабинеттері, жаратылыстану зертханалары, мектепте сабақ оқытудың Daryn Go, Booky Wooky авторлық әдістемелері, сондай-ақ оқу орнының жалпы инфрақұрылымы таныстырылды. Prometheus school былтыр 9 қарашада ашылған. Мектеп 840 оқушыға арналған. Аумағы – 12 мың шаршы метр. Білім беру мекемесін салу үшін 5,2 миллиард теңге инвестиция тартылған. Аз қамтылған отбасылардың дарынды балалары үшін білім гранттары бөлінеді. Мектеп жыл сайын грант санын арттыруды жоспарлап отыр.

Enlightenment Power Group қоры жүзеге асырып жатқан жобалар туралы мәлімет берілді. Қор директоры әрі мектептің бақылаушылар кеңесінің төрағасы Досым Бесбайдың айтуынша, 1400 оқушыға арналған «ФизТех» мектебін ашу жұмыстары жүргізіліп жатыр. Бұл мектеп түлектердің әлемдегі жетекші техникалық жоғары оқу орындарына түсуіне мүмкіндік туғызу үшін сапалы білім беруді көздейді. Мектеп құрылысын биыл қараша айында аяқтау жоспарланған. Жобаға тартылған инвестиция көлемі – 3,9 миллиард теңге. Мемлекет басшысы Prometheus School мектебіндегі білім беру және оқушыларды даярлау форматының ерекшелігін атап өтті. Сондай-ақ ұстаздарға табыс тілеп, олардың қызметі қоғам үшін маңызды екенін айтты.

## ПРЕЗИДЕНТ ТАПСЫРМА БЕРДІ

Мемлекет басшысы Қасым-Жомарт Тоқаев «Қазақстан» шахтасында болған өртке байланысты Үкіметке және Қарағанды облысының әкіміне апат себептеріне жан-жақты тергеу жүргізу, сондай-ақ зардап шеккендерге қажет барлық көмекті көрсету жөнінде тапсырма берді.

Үкіметке осы кәсіпорынға иелік ететін шетелдік компаниямен жұмысшылардың қауіпсіздігін мүлтіксіз қамтамасыз ету жөнінде келіссөз жүргізу тапсырылды. Шетелдік компанияға тиесілі кәсіпорындарда жиі қайталанатын апаттар олардың инвестициялық және өзге де міндеттемелерін өрескел бұзғанын көрсетеді. Аталған жағдайлар олардың Қазақстан нарығында қызмет етуіне қатысты шешім шығаруға ықпал етеді.

АҚ-қа қарасты «Қазақстан» шахтасында конвейер таспасы өртеніп, апат болды. Шахтада барлығы 227 адам болған. Сол күні шахтадан 222 адам жер бетіне шығарылды, қалған 5 кеншіні іздеу жұмысы жүргізілді. Шахтерлерді іздеу барысында 17 және 18 тамызда екі кеншінің мәйіті табылды. «АрселорМиттал Теміртау» көмір департаментінің «Қазақстан» шахтасында болған өрт салдарынан электрик Виталий Владимирович Слонков қайтыс болған. 57 жастағы марқұмның еңбек өтілі – 39 жыл.

## ИНФРАҚҰРЫЛЫМ ДАМУМАЙ, МӘСЕЛЕ ШЕШІЛМЕЙДІ

Астана қалалық мәслихатының депутаттары Ақмола облыстық мәслихатының депутаттарымен бірлескен отырыс өткізіп, елордамен шектесетін аудандардың өзекті мәселелерін талқылады. Бұл туралы қалалық мәслихат төрағасы Ерлан Каналимов әлеуметтік желідегі парақшасында жазды.

«Ақмола облысының Астанамен шектесетін аудандарының бірқатар мәселелері Ақмола облысының депутаттарымен бірлескен отырыста көтерілді. Біріншіден, бұл – әртүрлі салалардағы қала маңындағы аймақтарды, инфрақұрылымды дамыту және жетілдіру. Сондай-ақ, жиында қоғамдық көліктің жұмысына қатысты да сұрақ қойылды. Мысалы, Аршалы тұрғындары елордаға қатынайтын автобустарды шығаруды сұрайды. Сонымен бірге, жер учаскелерін тіркеу мәселелерін оңайлату, Есіл өзенін бірлесіп тазарту, қатты тұр-

мыстық қалдықтардың стихиялық үйінділерін жою мәселелерін шешу, жұмысқа орналастыру және тағы басқа мәселелер талқыға түсті. Басқосуда аумақтық ресурстарды оңтайландыру, абаттандыру және көгалдандыру жоспарларын бірлесіп әзірлеу туралы пікірмен бөлістім. Ақмола АЭК электрмен жабдықтауды жақсарту, жерлеуді абаттандыру мәселесі өзекті болып қала береді. Келесі бірлескен кеңесті ӘКК және мемлекеттік органдар өкілдерінің қатысуымен өткіземіз» деп жазды Е.Каналимов.

## ӘЛЕУМЕТТІК КОДЕКСТІҢ КЕМШІЛІКТЕРІН АТАДЫ

Елордадағы «Әйелдер мен отбасы құқықтарын қорғау» ҚБ өкілдері еліміздегі Әлеуметтік кодекстегі кейбір мәселелермен келіспейтінін айтты. Осы жайтты тиісті министрліктермен бірге талқылау үшін кеше олар Астана қаласындағы «Жанұя» отбасын қорғау орталығында дөңгелек үстел өткізді.



Аталған іс-шараға Еңбек және халықты әлеуметтік қорғау министрлігі, Денсаулық сақтау министрлігі, Астана қаласы Жұмыспен қамту және әлеуметтік қорғау басқармасы мамандары шақырылып, бірқатар қоғамдық бірлестік қатысты. – Әрине, Әлеуметтік кодексті әзірлеуде үлкен жұмыс атқарылды. Ел азаматтарының әлеуметтік жағдайын жақсарту мақсатында 500-ден астам өзгерістер мен толықтырулар ен-

гізілді. Бұл кодекстің өміріміздегі маңызын ескере отырып, қоғам болып оның халық жағдайына қалай әсер ететінін, кодекстің оң және теріс жақтарын талқылағымыз келеді. Атап айтқанда, цифрлы отбасы картасы, әлеуметтік төлемдер мен кепілдіктер туралы, жұмысқа орналасуға жәрдемдесу, Қазақстан әйелдерінің зейнетке шығу жасы, Семей ядролық сынағынан зардап шеккен азаматтарға берілетін әлеуметтік жәрдем, «Күміс жас» жобасы жайлы және зейнетақы аннуитеті туралы сұрақтарымыз бар. Аталған заң еліміздің экономикалық шынайы

жағдайына сәйкес келе ме? Инновациялар қоғамға қалай әсер етеді? Қазақстандықтардың әл-ауқаты қаншалықты төмен және олар қандай экономикалық зардаптарға әкелуі мүмкін? Осы секілді сұрақтарға жауап іздейміз, – деді «Әйелдер мен отбасы құқықтарын қорғау» ҚБ директоры Кенжеғайша Сембаева. Аталған қоғамдық бірлестіктің мүшелері алдымен әйелдердің бұрынғы зейнетке шығу жасын қайтаруды сұрады. – Мен миллиондаған қазақстандық аналардың атынан әйелдердің 58 жаста зейнетке



шығу жасын қайтаруды талап етемін. 55-тен асқаннан кейін әйелдер физиологиялық жағдайына байланысты жұмыс істей алмайды. Бізде, өздеріңіз білетіндей, зауыт-фабрика жоқ, 50-55 жастағылардың өзін ешқандай бизнес қабылдамайды. Басында осы мәселені ескеру керек еді. Басқа бағыттарға бөліп жатқан қаржыны Үкімет әйелдерді ертерек зейнетке шығаруға бағыттау керек. Біздің зейнет

жасына жақындаған әйелдердің жағдайын Еуропа елдерімен салыстыруға келмейді, – дейді аталған бірлестік мүшесі Майкен Бигарстанова. Еңбек және халықты әлеуметтік қорғау министрлігі әлеуметтік қамтамасыз ету және әлеуметтік сақтандыру департаменті директорының орынбасары Эльмира Тажиханова 2028 жылдан кейін әйелдердің зейнет жасын ұзарту мәселесі

қайта қаралатынын жеткізді. – Қазіргі таңда Денсаулық сақтау министрлігі ауыл медицинасына басым бағыт беретін тұжырымдама әзірлеуде. Соның аясында алдағы уақытта әйелдердің зейнет жасын ұзарту мәселесі де қарастырылады. Адамдардың денсаулығы мен тұрмыс жағдайына қарай зейнет жасын ұлғайту немесе қалдыру жайы белгілі болады, – деді Э.Тажиханова.

### ЕЛЕН ЕТКІЗЕР

Илон Маск пен Марк Цукерберг арасындағы жоспарланған жекпе-жек Италияда Ежелгі Рим стилінде өтуі мүмкін. Технология саласының көшбасшылары маусым айынан бері бір-бірін жекпе-жекке шақыруда. Гладиаторлық төбелес өткен жағдайда, одан түскен миллиондаған қаражат балалар ауруханасына беріледі деп күтілуде. Мұны естіген жәһан жұрты Цукерберг пен Маск арасындағы шоуды тағатсыздана күтіп жүр.



2022 жылы АҚШ-та шамамен 49,5 мың адам өз-өзіне қол жұмсады. Бұл – Екінші дүниежүзілік соғыс басталғаннан бергі статистикалық бақылау тарихындағы ең жоғары көрсеткіш. Құрама Штаттар елінде өз-өзіне қол жұмсау санының артуына атыс қаруына қолжетімділік пен депрессия жағдайының көбеюі теріс әсер етуде. Бұған адамдар арасындағы жылы қарым-қатынастың болмауы да себеп болуда.



2023 жылы Қытайда туғандар саны 8 миллионнан төмен болуы мүмкін. Бұл жағдай демографиялық болжамды нашарлата түседі. Бұл туралы Пекин университеті денсаулық ғылымы орталығының деканы Цяо Цзэн айтты. Профессордың сөзінше, соңғы 5 жылда Қытайда бала туу көрсеткіші 40 пайызға азайды. 2022 жылы Қытайда 9,56 миллион бала туып, соның салдарынан халық саны 850 мың адамға азайды.

## СКЕЙТ АЛАҢЫ АШЫЛДЫ

Қазақстан скейтбординг федерациясының президенті Жандос Рахметтің бастамасымен елордада «SOS балалар ауылы» аумағында толық жабдықталған және заманауи скейт алаңы ашылды. Бұл туралы қалалық мәслихат төрағасы Ерлан Каналимов мәлім етті.

Балаларға, алаңнан басқа, қажетті құрал-жабдықтар (роликтер, скутерлер, конькилер) сыйға тартылды. Болашақта федерация жаттықтырушылары балалар ауылының тәрбиеленушілеріне арналған тренингтер өткізеді.



## ТАБЫС ПЕН МҮЛКІН ДЕКЛАРАЦИЯЛАЙДЫ

Елорданың 120 мыңнан астам тұрғыны табысы мен мүлкін декларациялауы тиіс. 2023 жылғы 1 қаңтардан бастап Қазақстанда мемлекеттік мекемелер мен квазимемлекеттік сектор қызметкерлері және олардың жұбайлары үшін жалпыға бірдей декларациялаудың екінші кезеңі басталды.



Қазіргі уақытта елордада активтер мен міндеттемелер туралы декларацияны 120681 адам беруі қажет. Бұл туралы Астананың коммуникациялар қызметінде өткен брифингте елордалық Мемлекеттік кірістер департаменті басшысының орынбасары Қанат Балтабеков айтты.

Қазіргі таңда 120681 жеке тұлғаның 95538-і немесе 79,2 пайызы декларация тапсырды.

– Жалпыға бірдей декларациялаудың басты мақсаты – көлеңкелі экономиканы қысқартуды қамтамасыз ету, сыбайлас жемқорлық деңгейін төмендету, бюджетке қосымша түсімдерді қамтамасыз ету және әлеуметтік саясатты жетілдіру.

Салық кодексіне сәйкес, Қазақстанда жалпыға бірдей декларациялау 2021 жылғы 1 қаңтардан бастап енгізілді және 4 кезеңде өтіп жатыр, – деп еске салды спикер.

Мәселен, 2021 жылғы 1 қаңтардан бастап мемлекеттік қызметшілер мен оларға теңестірілген адамдар үшін жалпыға бірдей декларациялауды енгізудің бірінші кезеңі басталды.

2023 жылдан бастап мемлекеттік мекемелер мен квазимемлекеттік сектордың қызметкерлері және олардың жұбайлары декларация тапсыра бастады, онда 2022 жылғы 31 желтоқсандағы жағдай бойынша деректер көрсетілді.

2024 жылдан бастап – заңды тұлға-

лардың басшылары мен құрылтайшылары, сондай-ақ жеке кәсіпкерлер мен олардың жұбайлары.

2025 жылдан бастап – азаматтардың қалған санаттары, яғни елдің барлық ересек тұрғындары.

Декларациялауға Қазақстан Республикасынан тыс жерлердегі шетелдік банктердегі жылжымайтын мүлік, көлік құралдары, банк шоттарындағы ақша, барлық банк салымдары бойынша АЕК мөлшерінен 1000 есе асатын сомада, зияткерлік меншік, авторлық құқық объектілері және т. б. жатады.

«Декларацияны «салық төлеушінің кабинеті» арқылы электронды түрде (cabinet.salyk.kz), «электрондық үкімет» порталы (egov.kz), сондай-ақ esalyq азамат мобильді қосымшасы арқылы 15 қыркүйекке дейін беруге болады. Ал қағаз жүзінде ұсыну мерзімі – 15 шілдеге дейін» деді Қанат Балтабеков.

«ҚР Әкімшілік құқық бұзушылық туралы» кодексінің 272-бабының 1-тармағына сәйкес, активтер мен міндеттемелер туралы декларацияны белгіленген мерзімде ұсынбау ескертуге әкеп соғады. Бұл ретте, егер бұзушылық өндіріп алынғаннан кейін бір жыл ішінде қайталап жасалса, 15 АЕК мөлшерінде айыппұл салынады.

Жалпыға бірдей декларациялау бойынша сұрақтар туындаған жағдайда жеке тұлғалар 1414 нөмірі бойынша бірыңғай байланыс орталығынан кеңес ала алады.

Астананың Алматы ауданында бейнебақылау жүйесімен қосымша жабдықтау мәселелері талқыландыған кеңес өтті.

## БЕЙНЕБАҚЫЛАУ КАМЕРАСЫ ОРНАТЫЛАДЫ

Қазіргі таңда аудан көшелері мен көше қиылыстарының, тұрғын үй секторының 70 пайыздан астамы бейнемониторингпен қамтылған. Бұл аумақта қоғамдық тәртіптің сақталуына септігін тигізіп отыр.

Жыл басынан бері бейнебақылау жүйесінің арқасында аудан бойынша 158 қылмыс анықталған. Маусым-

ның соңына дейін қоғамдық тәртіпті қамтамасыз ету үшін ауданда тағы 200 камера орнатылады.

Бүгінгі таңда Алматы ауданының аумағында барлығы 7925 бейнебақылау камерасы жұмыс істеп тұр. Оның ішінде 1800 камера қиылыстарда және үй маңындағы аумақтардағы адамдар көп жиналатын орындарда орнатылған.

Бас қалада «Тоқта, интернет-алаяқтық!» атты іс-шара өткізілді. Астана қаласының әкімдігі, Нұра ауданы әкімдігі және полицияның бірлескен бастамасымен жүзеге асырылған іс-шараға жастар мен еріктілер де атсалысты. Қаладағы халық көп шоғырланатын саябақтағы жол бойына трафареттер арқылы интернет-алаяқтықтан сақтандыратын сөздер жазылды.

## ИНТЕРНЕТ-АЛАЯҚТЫҚҚА ТОСҚАУЫЛ

– Бұл акция Ішкі істер министрлігі бекіткен «Хайтек» шұғыл алдын алу іс-шарасы негізінде іске асуда. Көбіне егде және орта жастағы жандар, оның ішінде әйелдер киберқылмыстың құрбаны болады. Олар Instagram, Facebook, Telegram сияқты әлеуметтік желілерде, «OLX», «Крыша», «Колеса» сияқты сауда-саттық сайттарында интернет-алаяқтықтың құрығына түсіп қалып жатады. Осындай келеңсіздіктің алдын алу үшін осы шараны өткізіп отырмыз. Адамдар көп жүретін жерлерге трафареттер арқылы ескерту жазып, тұрғындарға алаяқтарға алданып қалмаудың жолын түсіндіреміз, – деді Нұра ауданы Полиция басқармасы басшысының орынбасары Жәнібек Сүлейменов.

– Біз Ішкі істер министрлігіндегі әріптестерімізбен бірге интернет-алаяқтықтың алдын алуға арналған іс-шараны ұйымдастыруға атсалысып отырғанымызға қуаныштымыз. Өйткені біз, мемлекеттік орган, мемлекеттік қызметкер ретінде қазіргі адамдардың тез ақша табу, инвестицияны көбейту, сауда-саттыққа байланысты әртүрлі ақпарат

пен жарнамаға оңай сеніп, алданып жатқанына алаңдаймыз. Қазір интернет-алаяқтық статистика бойынша ұрлықтан кейінгі екінші орында тұр. Сондықтан киберқылмыстың үлесін азайтып, азаматтарды қаржылық сауаттылыққа үйрету – міндетіміз, – деді Нұра ауданы әкімдігі инфрақұрылым бөлімінің маманы Наиль Нигматуллин.

Аталған акцияға «Қанат» волонтерлік қоры еріктілері мен «Астана жастары» жастар ресурстық орталығы да белсене атсалысты.

– Бізде киберқылмыстың алдын алу жұмысы жүйелі жүргізіліп тұрады. Сондай-ақ жыл сайын алдын алу іс-шаралары өтеді. Оқу орындарында жастарға түсіндіру жұмысы тұрақты жүргізіледі. Себебі интернет-алаяқтық жастардың арасында өте көп. Өйткені интернет іс-шараны ұйымдастыруға атсалысып отырғанымызға қуаныштымыз. Өйткені біз, мемлекеттік орган, мемлекеттік қызметкер ретінде қазіргі адамдардың тез ақша табу, инвестицияны көбейту, сауда-саттыққа байланысты әртүрлі ақпарат



## ШАХМАТ ТАҚТАСЫНДАҒЫ ТАРТЫС

Алматы ауданының ардагерлері шахматтан сынға түсті. Жарысқа 65-90 жас аралығындағы 22 қария қатысты. Алматы ауданы Ардагерлер кеңесінің төрағасы Марат Мұстафин турнирді ашып, сәттілік тіледі. Ал турнирдің төрешісі Мерғалым Нұрымов ойын ережесімен таныстырды.

Алматы ауданы әкімдігінің қолдауымен өткен жарыс тартысты өрбіді. Интеллектуалды ойынға ақсақалдар жақсы дайындықпен келіпті. Нәтижесінде Пайзұлла Тайжанов бірінші, Серікбол Түлетев екінші, Жамбыл Нұрманов үшінші орын алды.

Әжелер арасында Кенжетай Жанұзақова мен Гүлжан Көшкіншінова

екі рет тең ойнап, чемпион үшінші ойында анықталды. Сөйтіп, Кенжетай апаға бірінші, Гүлжан апаға екінші орын бұйырды. Үшінші орынды Бәтима Түсіпова иеленді.


Уәлихан Бекенов пен Оралбек Кенжетай шахматты жақсы меңгергенін көрсетті. 90 жасқа келген Цай Климентийге арнайы сыйлық берілді.

Белсенді өмір сүру орталығының басшысы Мұхтар Еркетаев жабылу салтанатында жарысқа белсенді қатысқан ардагерлерге алғысын білдірді.

**Манап ӘДІРЕШЕВ,**  
Астана қаласы Алматы ауданы медиатобының жетекшісі

**Миға ұқсас чиптің көмегімен жасанды интеллект энергияны үнемді пайдаланатын болады.**

Ми тәрізді технология смартфондарға арналған жасанды интеллект чипін өте тиімді етіп, қуат көзін үнемді жұмсауға көмектеседі. Жаңа технология адам миындағы нейрондық байланыстарға ұқсас жұмыс істейтін компонентті қайталап жасады. Бұл технологияның артықшылығы – аз қуат тұтынған жағдайда да жоғары өнімділікке қол жеткізеді.



**Быттыр әлем халқының әл-ауқаты нашарлап, 2,4 пайызға төмендеген. Бұл – 2008 жылғы қаржы дағдарысынан кейін болмаған жағдай.**

Мұндай ахуал әсіресе АҚШ, Жапония, Қытай, Канада мен Австралияда қатты байқалып отыр. Өткен жылы ауқатты кісілердің де байлығы айтарлықтай азайған. Миллионерлер саны 59 миллион адамға дейін кеміді. Бұған жаһанды жайлаған қымбатшылық әсер етті.

## ҮЙ ЖАНУАРЛАРЫН ТЕГІН ТІРКЕЙДІ

Елорда тұрғындары 2023 жылдың 1 қыркүйегіне дейін иттері мен мысықтарын тегін чиптеп, үй жануарларын tanba жануарларды есепке алу ақпараттық жүйесінде тіркей алады.

Елорда тұрғындарында үй жануарларын жаздың соңына дейін «Астана ветсервиске» мына мекенжай бойынша тегін чиптеу мүмкіндігі бар: Сарыарқа ауданы, С.Мұқанов көшесі, 2/1 (Арнайы ХҚКО), тел.: +7 (747) 623 53 57, +7 (747) 672-85-27.

Жұмыс уақыты: дүйсенбі-жұма 9:00-ден 18:00-ге дейін (түскі үзіліс: 13:00-14:00), сенбі күні 9:00-ден

13:00-ге дейін. Иттер мен мысықтарды тіркеу кезек тәртібімен өтеді. Тіркеу рәсімі үшін жануармен бірге келу, сондай-ақ өзімен бірге мобильді азаматтар базасында тіркелген телефон болуы қажет. Сонымен қатар, Астана тұрғындары өз үй жануарларын ақылы негізде елорданың бірнеше ветеринарлық клиникасында тіркеуіне болады.









